



Club da skiunzs Zuoz

Protocol da la radunanza generela dals 7 december 2018

Restorant Pizzet Zuoz

Preschaints: 26 commembers e la suprastanza cun 7 persunas. In tuot 33 persunas.

S-chüsos: 34 commembers s'haun s-chüsos.

- Tractandas:**
1. Bivgnaint
 2. Protocol da la radunanza generela dals 08.12.17 (vair pagina d'internet CdS Zuoz)
 3. Rapports: President
Schef cuorsas e materiel
Schef giuvenils
 4. Müdamaints
 5. Quint annuel 2017/2018
 6. Rapports dals revisuors e dis-charg a la suprastanza
 7. Tschernas
 8. Onorificaziuns
 9. Programm annuel 2018/2019
 10. Infurmaziun Restorant Pizzet GmbH
 11. Varia

1. Bivgnaint

Il president salüda a 33 commembras e commembers, spzielmaing ils commembers d'onur ed anteriurs presidents.

La bannida es gnida tramissa a temp ütil e las tractandas ordinarias vegnan acceptedas da la radunanza unanimamaing.

Scu scrutinadurs vegnan proponieus Robert Pinchera e Peider Gotsch, elets ed acceptos sainza cuntravuschs.

2. Protocol da la radunanza generela dals 8 december 2017

Il protocol da la radunanza generela dals 8 december 2017 as ho pudieu leger sülla pagina d'internet dal CdS Zuoz e vain approvo unanimamaing da la radunanza. A vain ingrazcho ad Andi Pauchard per la cumpilaziun.

3. Rapports

Rapport anuel 2017/2018 dal president Claudio Duschletta:

Chers commembers

Che inviern quel passo! Quaunta naiv cha vains clappo, adüna darcho! Bellischem! Quist sun ils impissmains chi'm vegnan adimaint scha pens inavous sül inviern passo e sün l'ultim an da gestiun. Ma am vegnan eir adimaint plets scu Restorant Pizzet, 50 ans Maraton Engiadiais ed oter pü. Ma ün zieva l'oter.

La suprastanza s'ho chatteda quatter voutas per organiser ün program interessant e vario. La stagiun ho alura cumanzo cul di da finischun da l'JO illa sela da gimnastica a S-chanf. Noss'JO funcziuna adüna fich bain, que chi nu's inclegia da svesa, siand cha hozindi vain la concorrenza dad otras spüertas adüna pü granda. Ma cun sur 40 iffaunts chi faun passlung u/e vaun culs skis vains nus propcha üna spüerta bunischma. Ils früts da bgers ans continuited as demuossan uossa ed eau speresch cha rivains auncha da mantegner la qualited bgers ans. Scha ün di nu rabagliaians noss iffaunts pü süls skis, saja que passlung ma impustüt alpin, alura buna not. Ma Flurin e sia squedra pisseran cha que nu capita.

La radunanza generela da l'an passo sü Pizzet ho motivo a bgers commembers da participar – sgüra eir perche cha'l proget Pizzet d'eira natürelmaing actuel scu mê. Zieva la revisiun dals statüts es Thömi Pinchera gnieu tschernieu scu nouv vice-president dal club. Pizzet es resto il tema dominant düraunt tuot la stagiun passada. Ün rapport detaglio sur da la prüma stagiun vögl eau der suot la tractanda 10.

In schner 2018 ho giu lö la Diagonela, e que per la prüma vouta sülla stricha originela fin sü San Murezzan e fin giò S-chanf, cun böt sün Plaz – ün purtret bellischem! Eau vulesch gratuler a tuot il comitè d'organisaziun suot la bachetta da Ramun Ratti per lur granda lavur e persistenza.

Zieva cha nus svesa vains surpiglio la gestiun dal Pizzet vains eir darcho organiso il di dals veterans cò a Zuoz. Ad es sto propcha pachific ed ün bel di chi vain organiso eir in avegnir, impustüt perche ch'EAU tuoch uossa eir tiers tar quella categoria.

Bgera lavur ho do l'organisaziun dal Maraton Engiadinais chi ho festagio sieu 50avel anniversari! Nus dal club essans respunsabels per l'organisaziun dal böt, üna carica importanta chi vain evasa da Thömi e Thomas cun grand ingaschamaint in möd perfect. Eau sun però adüna darcho stut scu cha Fredy es capabel d'organiser la restoraziun cun grills e halla, uschè cha tuot ils 14'000 partecipants e millis d'aspettuors clappan qualchosa da manger e da baiver. Grazcha Fredy – sainza Te nu dess que üngün Maraton Engiadinais, u almain üngüna restoraziun giò S-chanf per na güsta exagerer.

La cuorsa dal club vains organiso l'inviern passo in ün nouv möd, voul dir cun üna bella cuorsa da passlung in Resgia ed üna cuorsa da skis sü Pizzet, que chi nun es ünguotta da nouv. Ma la rangaziun ed il ster in cumpagnia vains natürelmaing fat sü Pizzet. Ils bgers partecipants – 112 in total demuossan cha l'interess es grand, na be tar bgers iffaunts ma eir tar creschieus, que cha chat fich bel. La gita Risotto sün Arpiglia es ün punct fix in nos program. Ingrazcher vulessi al chef da chadafö Flurin ed a sieu sous-chef Lala chi preparan adüna ün risotto grandius, eir scha per mieu gust nu sun las tschiguollas be tagliedas memma grandas, ma eir memma nummerusas.

Ziev'ün inviern fich intensiv cun evenimaints e bgeras uras da laver giò plats sù Pizzet vains decis in suprastanza da rinunzcher süll'excursiun la fin da la stagiun. Sperains però cha rivains darcho da fer üna quist inviern.

Propcha l'ultim di da l'an da gestiun, ils 30 gün vains organiso la festa dals voluntaris sù Pizzet e na pü illa tenda dal Concours. Zieva 10 ans d'eira ura da fer qualchosa nouv ed eau craj cha que es üna fuorma simpatica. Quels chi d'eiran haun giodieu la cumpagnia, il manger dal grill e'l büffet da salata, ma sgür eir las bavrandas our sün terrassa.

Düraunt tuot l'inviern ans ho accumulagno aunch'ün oter proget: ad ho do novs vstieus per l'JO da passlung chi sun gnies preschantos be aunz cuort e cha'ls passlungist portan cun granda blaga. Ingrazcher vuessi a Flurin Derungs ed Andrea Feuerstein per l'organisaziun. Ma impustüt vuessi ingrazcher a las vschinaunchas da la Plaiv ed als sponsuors per lur sustegn finanziael per cha vains insomma pudieu realiser quist proget. Sperains cha quels vstieus tegnan uossa ün pèr ans.

Uschè cha vzais cha eir quist an da gestiun es sto intensiv ed interessant. Eau vuess per glivrer ingrazcher a mieus collegs da la suprastanza chi s'ingasheschan cun bgeras uras da lur temp liber per nossa societad. A Karin per üna contabiled impeccabla ed a Nadia per protocols scrits in s-chet rumauntsch.

Ingrazcher vuessi eir als mneders da l'JO: saja que d'utuon cun Wolfgang ed Yvonne, per passlung cun Andri Marugg e sia squedra da mneders, als magisters da la scoula da skis per l'JO dals alpines ed a Maura per l'JO da la scouline.

Grazcha fich per voss sustegn e per la fiduzcha ed a tuots ün bel inviern!

Rapport schef cuorsas e materiel 2017/2018 Thomas Pinchera:

La prüma stagiun zieva ils champiunedis mundiels a San Murezzan.

La stagiun 2017/2018 ho cumanzo fich allegraivla, zieva divers ans cun pocha naiv vains survgnieu già in december 2017 ün bel «sfratsch» dal «or» alv.

La prüma cuorsa d'eira eir in quista stagiun La Diagonela als 20 schner 2018. Nus vains pudieu mner tres quista cuorsa per la prüma vouta sül traget originel da 65 km. La Diagonela, la Pachifica e la Cuorta paun be gnir mnedas tres, in quist möd e sün quists tragets grazcha il grand sustegn dal club da skiunzs Zuoz. Minch'an pudains nus fer quint cun numerus commembers da nos club chi'ns sustegnan scu voluntaris. Grazcha fich eir dal la vart dal OK da la Diagonela.

Ils 4 marz 2018 ho gieu lö la cuorsa BEST, quella vains nus organiso insembel clubs da skis «Speciale» e «Giorgio Rocca». Eir scha üna granda part dals voluntaris haun güdo i'l Restorant Pizzet ed eau svesc d'eir in carica per la cuorsa da duonnas, ans es que reuschieu da fer duos bellas cuorsas dal JO e Juniors sül munt da Pizzet.

Il Maraton Engiadinais ho gieu lö ils 11 marz 2018. La 50evla ediziun d'eira uschè bain frequentada scu üngün otra fin uossa. Que nun es be sto üna granda sfida per l'organisaziun da la cuorsa ma eir per nus dal club da skis. Ün program speciel per l'anniversari da quist grandius evenimaint e l'ora haun chaschuno ün u l'oter «rumpatesta» illa suprastanza. Ma eir tar quist Maraton vains pudieu bivgnanter ün grand numer da commembers dal cds Zuoz il areel da böt a S-chanf. Grazcha voss'agüd vains pudieu spordscher als curriduors ed als spectatuors üna bellischma festa d'anniversari.

Üna stagiun pütost quieta ho chatto sia fin als 17 e 18 marz 2018 cullas maestraunzas dal club da skiunzs. Las cuorsas da passlung haun gieu lö in sanda saira giò la Resgia. Il di zieva a bunura ans vains chattos sù Pizzet per tschercher ils pü svelts skiunzs. Zieva quists sforzs süls skis da passlung e süls skis alpines vains festagio la finischun da la stagiun e surdo ils premis a noss champiuns. Cun que ho las stagiun 2017 / 2018 piglio sia fin.

Grazcha fich a tuot ils voluntaris dal club da skiunzs Zuoz.

Materiel

Il cabel per piglier il temp sülla pista da Pizzet es in ün bun stedi e po gnir druvo eir quist an per diversas cuorsas.

Il chamannin da partenza es plaunet in ün stedi pütost critic e stuvevess plaunet gnir rimplazzo.

Il rest dal materiel es in bun uorden.

Rapport dal schef juvenils 2017/2018 Flurin Derungs:

Cun que cha`s disch ch`ün bun sportist d`inviern vain fat da sted, vains nus cumanzo cul trenamaint da sted als 23 avuost. Allegraivelmaing vains pudieu piglier incunter 42 annunzchas totelas. Da quellas haun fat 8 be passlung, 12 be alpin e 22 haun perfin fat tuot las duos disciplinas.

La prüma part dal trenamaint da sted ho mno Wolfgang Hoffmann e la seguonda part ho fat Maura Duschletta. Cu ils ans aunz vains glivro giò il trenamaint da sted cun ün`occorrenza cumünaivla cun staffettas e pitschens premis.

JO da passlung

Zieva cha Andi e sieu team haun decis da surder l`JO da passlung, zieva desch ans cun bger ingaschamaint e plaschair a qualchün oter, ho cumanzo la tschercha d`ün nouv schef.

Cun Andri Marugg vainsa chatto ün mneder ingascho chi riva da motiver ils iffaunts. Sias gitas da naiv lamma sur mincha muot e sagl, cun ün u`oter „sturz“ sun legendars.

Ils trenamaints sün naiv haun cumanzo als 22 november e sun ieus fin als 21 marz. Que ho do ün bun masdügl da trenamaints classics e skatings, vario cun tecnica, teoria e gös, uschè vains pudieu motiver ils iffaunts da gnir regulermaing a trenamaint. Il highlight da la stagiun, es sgür steda la cuorsa dal club e per singuls iffaunts auncha ün u`otra cuorsa regiunela.

Cun ün zievamezdi da biathlon, chi ho gieu ün rimbomb fich positiv vains pudieu glivrer giò la stagiun cun ün bel evenimaint cumünaivel.

In quist`ocasiun vulevess ingrazcher a tuot ils agüdaunts ed a las agüdauntas da l`JO da passlung, in prüma lingia ad Andri Marugg per sia buna lavur. El ho gieu diversas personas chi l`haun sustgnieu, Andi Pauchard, Tamara Heregger, Corina Steger Badilatti, Jeannine Böhm, Nico e Sophie Erne e Patrick Bauman ed a Stefanie Lehnhort per la lavur administrativa. Grazcha fich.

JO alpin

Zieva las bunas experiencias culla scoula da skis Zuoz vainsa decis da collavurer eir quist inviern cun Gudi e sieu team. Uschè ho cumanzo la stagiun cun trenamaint sün naiv als 2 december sü Marguns. Zieva trais trenamaints sü Marguns vains als 23 december pudieu trer las prümas stüertas illa naiv da Zuoz. Ün nouvum es sto quist`an cha l`JO ho organiso ün JO-Cup. Ils iffaunts haun üna vouta in schner ed üna vouta in favrer pudieu absolver üna cuorsa interna. Dürant ils oters trenamaints staiva il plaschair vi dal ir cul ski sainza squitsch d`occorrenza aint il center.

Cun que cha que ho quist an gieu uschè bgeras annunzchas vains stuvieu fer trais impè da duos gruppas scu`ls ultima ans. Adonta ils bgers iffaunts nu vains gieu üngüns accidaints pü grands e vains pudieu passer trenamaints varios cun tneders motivos.

Zieva intensivs trenamaints in sanda bunura haun ils iffaunts pudieu giodair il gianter i`l Restorant Pizzet, eir quist ün nouvum. Culla cuorsa dal club, in dumengia als 17 marz, vain gieu üna bella finischiun da la stagiun, cun festa, tombola ed ün bun manger.

Üna stagiun grattageda, na be pervi da la bgera naiv e las bunas relaziuns, dimpersè eir pervi cha nus vains minch`an bger sustegn da divers agüdaunts ed agüdauntas.

Eau vules ingrazcher als commembers da la suprastanza, a la scoula da skis da Zuoz ed a tuot quels e quellas chi haun in üna u l`otra maniera sustgnieu al club.

Ils rapports anuels vegnan acceptos unanimamaing sainza cuntravuschs e cun grand applaus.

4. Müdamaints

Düraunt l`an da gestiun ho que do ils seguaints müdamaints:

A sun entros 19 novas persunas scu commembers dal club da skis e e 17 persunas haun abanduno il club. Il club as cumpuona actualmaing our da 45 commembers JO, 158 commembers passivs, 63 commembers activs e 26 commembers libers e d`onur. Totelmaing sun que 292 commembers.

5. Quint annuel 2017/2018

La chaschiera Karin Casty preschainta cuort il rendaquint finel e`l bilauntsch.

(vair rendaquint e bilauntsch detaglio)

Nus serrains giò il rendaquint annuel cun ün minus da 240 francs e 33 raps.

La perdita annuela as cumpuona impustüt our da la differenza da la festa dal Maraton Engiadinais in conguel cun l`an 2017. La rendita dal Maraton 2018 d`eira 3'619 francs e 13 raps pü poch scu l`an 2017.

Allegraivel es però il fat, cha vainsa pudieu motiver da pü iffaunts da piglier part a nossa societad. Cun que s`haun augmantedas las entredgias da la contribuziuns. Totel sun las entredgias da commembers 2'615 francs pü otas scu l`an passo.

In consequenza dad avoir dapü commembers giuvenils ho que chaschuno abunand 1'000 francs dapü cuosts per ils mneders sia alpin ed eir passlung.

La faculted per la fin da gün 2018 importa 20'533 francs e 83 raps

Il rendaquint vain accepto unanimamaing sainza cuntervuschs.

6. Rapport dals revisuors

Claudio Duschletta prelegia il rapport dals revisuors Ramun Ratti e Carla Robbi per l`an 2017/2018 e propuona a la radunanza da der dis-charg a la suprastanza. (Vair rapport da revisuors)

Il rapport vain accepto e la radunanza do dis-charg a la suprastanza.

Nos president Claudio Duschletta ingrazcha als revisuors Carla Robbi e Ramun Ratti per lur lavur.

7. Tschernas

Quist an nu do que üngünas tschernas, siand cha tuots in suprastanza sun pronts da fer inavaunt. La suprastanza ho però cumanzo a discuter la tematica, siand cha singuls da la suprastanza sun già tiers daspö bgers ans ed a füss temp da fer piazza per forzas pü giuvnas.

8. Onorificaziuns

Eir quist an vains nus divers commembers chi sun tiers in nossa societad daspö bgers ans. Nus pruvains ad eruir quels ma nu pudains garantir cha las datas sun correctas, siand cha Swiss-Ski vaiva fat ün batibuogl aunz ün per ans.

Daspö 25 ans aint il club sun Ginia Ratti e Jakob Stieger. Siand cha els haun müdo traunter aint üna vouta dad activ sün passiv nu do que displaschaivelmaing la medaglia d'argient da Swiss-Ski.

Daspö 25 ans commembers activs dal club e da Swiss-Ski sun Christian Haller, Dorette Haller, Peter Andri Vital, Monika Zraggen ed Andi Pauchard. Els clappan la medaglia d'argient.

Heinz Bopp es daspö 40 ans commember activ dal club e da Swiss-Ski. El clappa la medaglia d'or da Swiss-Ski.

Cun Anja Lozza, Maurus Lozza ed Yanik Pauchard vegnan onuros 3 atletas ed atlets chi haun l'ultima stagiun raggiunt bgers e fich buns resultats naziunels ed internaziunels aint il sport da prestaziun da passlung. A vegnan prelets numerus grandius resultats dals trais atlets e gratulo pels tels. Ad Anja, Maurus e Yanik vain giavüscho tuot il bun per l'avegnir e bun success per la stagiun chi vain.

9. Program anuel 2018/2019

Il program anuel dal Cds Zuoz es eir per la stagiun 2018/2019 darcho interessant e vario (vzair program anuel detaglio).

La Gita Risotto ho nouv lö als 19 avrigl 2019.

Il program anuel 2018/2019 vain accepto unanimamaing da la radunanza. Grazcha fich e nus ans allegrains sün bgeras bellas uras in cumpagnia da nos club.

10. Infurmaziun Restorant Pizzet Zuoz GmbH

Claudio prelegia las seguaintas infurmaziuns dal Restorant Pizzet Zuoz GmbH:

La prüma stagiun es passeda. E que cun ün bun esit: nus vains pudieu pajer tuot las pejas dals impiegos e dals voluntaris, tuot ils quints dals furniturs, il fit a la SSZ, las impostas, scriver giò üna part dal inventar cha vaivans da cumprer nouv – ed a la fin es dafatta resto ün pitschen guadagn. Ma tar las cifras vögl eau tuorner zieva aunch'üna vouta.

Ad es sto üna stagiun intensiva. Na be pervi da la bgera naiv. Nus vaivans al cumanzamaint memma poch persunel fix e vains druvo l'agüd da tuot quels bgers voluntaris sur las vacanzas da Nadel e Bümaun per gnir maister culla situaziun. Ils 29 e'ls 31 december 2017 d'eiran duos dis da pumpa inua cha vains lavuro il pü ferm. Üna colonna fin our sün terrassa per clapper qualchosa da manger e da baiver – incredibel. Eau nu se cur cha que ho do que l'ultima vouta sü Pizzet. Las bunas relaziuns in generel e las pistas plain stachidas sü San Murezzan haun motivo a bgers a gnir a Zuoz culs skis! Sperainsa cha que saja eir quist inviern darcho il cas.

Zieva ils dis da festa vains fat üna valütaziun da la situaziun e decis dad impiegher dapü persunel per survivor fin la fin da la stagiun. Da lò davent es ieu meglder, eir scha vaivans adüna darcho dabsögn agüd da voluntaris. A quels voluntaris chi sun gnies adüna darcho a güder – e que bgeras uras – vulesse eau ingrazcher cordielmaing. Ma eir a quels chi haun forza pudieu güder be singulas uras ingrazch eau. Nus tuots varons vis quaut düra cha la lavur illa gastronomia es. Eau per mia part d'he imprais fich bger.

Ingrazcher vulesse eau eir a Rageth Luzi, nos mneder da gestiun. Insembel cun sia mamma Angelika haun els prasto fich bger per nos affer. Eir il rest dal persunel ho fat granda lavur, e nus essans fich cuntaints cha bod tuots tuornan tar nus. Scu cha vus savais vains nus (que sun eau insembel cun Karin e Fredy scu respunsabels da la Pizzet GmbH) decis da tschercher üna nouva soluziun a regard la gestiun dal restaurant. Nus essans fich cuntaints cha Ursula Hofer, chi d'eira l'inviern passo in chadafö e maina da sted la Chamanna Lischana sur Scuol, ho surpiglio la carica da scheffa e maina il prossem inviern il restaurant.

Aunz ün an d'he dit il seguaint: Nus vains cumanzo quist proget in avrigl 2017 cul böt da fabricher sü qualchosa düraivel. Na il svelt guadagn es nos böt – ma da s-chaffir ün lö inua cha giasts ed indigens as chattan e giodan la bun'atmosfera. Nus ans vains da der almain trais ans temp ed eau sun persvas cha que vela la paina. Sch'eau vez cun che ingaschamaint cha bgers da nus sun tiers, schi es que dapü scu be gestir ün restaurant – que es ün proget important per nos club, ma eir per nossas vschinaunchas e tuot las generaziuns chi partecipeschan.

Quistas frasar pudessi repeter eir hoz darcho! Il prüm an d'eira ün an da prouva. Il seguond an as po profiter da las experianzas ed optimer inua pussibel. Aint il terz an però stu l'affer alura girer uschè cha forza as po dafatta ponderer da reorganiser tuot l'andamaint – in noss ögls nun es il böt quel, cha'l club stu gestir il Pizzet pels prossems 50 ans ... stains a garder scu cha tuot as sviluppa. Nus essans insomma tiers cun cour ed orma, scu bgers da vus eir. Eau in mincha cas m'allegr sün quista stagiun e giavüsched ad Ursula e sia squeda bun success ed impustüt buna gnierva.

Uossa auncha ün pêr cifras per cha's pudais fer ün purtret da las dimensiuns:

Düreda da la stagiun: dals 22.12. fin als 16.03. – dimena 87 dis. Üna stagiun fich cuorta. Ed alura eir auncha 2 dis serro in schner pervi da priewel da lavinias!

Schmerdsch totel: frs. 385'917.25

Schmerdsch in media: frs. 4'529.00 per di, inclus occurenzas specielas

Di fù ferm: 31.12. cun frs. 16'258.00

Di pü debel: 17.01. cun frs. 50.00

Fit pajo a la SSZ: frs. 42'000.00 (30'000 Schmerdsch e 12'000 abitaziun/fix)

Cuosts da persunel: frs. 145'000.00

Pejas voluntaris: frs. 31'000.00

Cuosts da materiel: frs. 110'000.00 (mangiativas, bavrandas)

Amortisaziuns: frs. 6'000.00

Guadagn: frs. 29.46

Interessant saro alura a pudair congualer in avrigl da l'an chi vain las cifras da quist inviern. Nus vains eir quist'utuon stuvieu cumprer auncha divers inventar zieva cha vains bado che chi mauncha tuot. Impustüt speresch eau però sün bell'ora: L'inviern passo vaiva bainschi bgera naiv, ma eir bger trid e

fraid. Nossa bella terrassa nu vains pudieu druver bgers dis e que as bada enorm sül schmerdsch. Scha la terrassa gira schi fo que oura svelt üna vouta frs. 5'000.00 al di.

Ma eau craj cha nu pudains plaundscher! Ad es ieu tuot bain ed eau craj cha nus tuots pudains esser ün poïn superbis da que cha vains ragiunt.

Karin, Fredy ed eau vains investieu diversas uras in quist proget. Karin scu responsabla da l'administraziun, Fredy per la restoraziun ed eau per la comunicaziun. La collavuraziun ho funcziuno fich bain e nus essans adüna gnieu bain perüna ün cun l'oter. Ad els duos vulesse eau ingrazcher cordielmaing per la buna collavuraziun e las bgeras uras prastedas, que chi nu's inclegia da svesa. Ingrazcher vulessi però eir a Flurin ed a Thömi chi'ns haun güdo bgeras uras cun lur experienza professiunela.

12. Varia

Il president ingrazcha a tuot quels chi haun in ün möd u l'oter contribuieu vi da la vita da nos club da skiunzs. Impustüt a la suprastanza per la buna collavuraziun ed als mneders da l'JO per lur grand ingaschamaint.

Scu punct culminant da quista stagiun ans spettan la 6evla La Diagonela ed il 51level Marathon Engiadinais.

Ludwig Denoth surpiglia il pled ed ingrazcha a la suprastanza per la lavur prasteda. Ad es adüna darcho bel da vzair quaunt bain cha nos club da skiunzs funcziuna.

Dorette Haller renda attent cha la Chamanna SAC Es-cha hegia clappo il permiss per fabricher aunch'üna part vi da la chamanna. La fabrica cumainza l'an chi vain zieva Pasqua. Agüdaunts, saja que per sbadiglier naiv però eir per otras lavurs sun adüna bainviss ed as paun annunzcher tar Christian Haller.

Il president manzuna in quist connex, cha scha las cundiziuns per mner tres la cuorsa dal Kesch sajan bunas, vain pruvo d'organiser darcho la cuorsa.

Andi Pauchard surpiglia il pled e ingrazcha a la suprastanza per la lavur prasteda. Impustüt ingrazcha el a Flurin Derungs ed Andri Marugg per la grandiusa lavur per l'JO. Zieva ün an cha Andi nun es pü illa suprastanza dal club da skiunzs observa'l adüna darcho gugent ils iffaunts chi frequentan l'JO ed ho plaschair cha funcziuna bain e cha la cifra dals participants ho darcho pudieu gnir augmanteda. Andi renda attent a la suprastanza cha'l bon per üna lecziun da passlung ch'el vaiva regalo saja aunch'adüna valabel.

La radunanza vain serreda a las 20:20 h.

In buna fé

Chapella, 10 december 2018

L'actuar

Nadia Heis